

48. fundur Breiðafjarðarnefndar, haldinn 15. mars 2004 á Hótel Framnesi í Grundarfirði

Mættir: Friðjón Þórðarson formaður, Guðríður Þorvarðardóttir varaformaður, Ævar Petersen, Ásgeir Gunnar Jónsson, Þórólfur Halldórsson, Magnús A. Sigurðsson, Sigurður Þórólfsson og Jóhannes Gíslason.

Fundarritari: Sigríður E. Elisdóttir.

Formaður setti fund kl. 11:00

DAGSKRÁ FUNDARINS

Fundargerð 47. fundar

Formaður las upp fundargerð 47. fundar.

Afgreiðsla: Fundargerðin var samþykkt.

Frumvarp til laga um breytingu á lögum nr. 64/1994 um vernd, friðun og veiðar á villtum fuglum og spendýrum

Tekið var fyrir erindi frá umhverfisnefnd Alþingis, dags. 2. mars 2004, þar sem óskað er eftir umsögn Breiðafjarðarnefndar um frumvarp til laga um vernd, friðun og veiðar á villtum fuglum og spendýrum, 594. mál, ernir, hreindýr, stjórnsýsla o.fl. Mikil umræða átti sér stað um frumvarpið. Jóhannes Gíslason lagði fram áherslupunkta sína um arnarvernd. Tekið var matarhlé kl. 12:00, en umræðu var framhaldið kl. 12:30.

Afgreiðsla : Ákveðið var að fresta afgreiðslu málsins, en Þórólfur tók saman punkta sem nefndarmenn munu vinna út frá við afgreiðslu málsins eftir fundinn.

Sjóvarnir við Framnes-Torfabót og við Grundargötu, Grundarfirði, Eyrarsveit.

Tekið var fyrir erindi Umhverfisstofnunar dags. 12. mars sl. Í erindinu er óskað eftir umsögn Breiðafjarðarnefndar um sjóvarnir í Grundarfirði skv. meðfylgjandi bréfi frá Skipulagsstofnun, þar sem óskað er álits Umhverfisstofnunar á því hvort ofangreind framkvæmd skuli háð mati á umhverfisáhrifum að teknu tilliti til 3. viðauka laga um mat á umhverfisáhrifum nr. 106/2000.

Afgreiðsla: Það er mat Breiðafjarðarnefndar að framanskráðar framkvæmdir eins og þeim er lýst í fylgigögnum með erindi Umhverfisstofnunar séu ekki háðar mati á umhverfisáhrifum.

Reglugerð um vernd menningarsögulegra minja

Magnús sagði frá því að hann hafi sóst eftir athugasemdum við reglugerðina frá Húsafriðunarnefnd en enn ekki fengið, en þar sé gerð reglugerðarinnar fagnað.

Nefndarmenn fóru yfir drög að reglugerð og komu með sínar tillögur að breytingum.

Afgreiðsla : Magnús mun halda áfram vinnu við reglugerðina og senda nefndarmönnum til frekari skoðunar.

Örnefnaskráningar að Dröngum

Ásgeir Gunnar sagði tilgang Breiðafjarðarnefndar með örnefnaskráningum að forða menningarsögulegum minjum frá glötun. Nefndarmenn töldu að æskilegt væri að í samningi við Ísgraf/Loftmyndir væru ákvæði um að Breiðafjarðarnefnd fengi útprentaðar loftmyndir af jörðunum með skráningunum á til eignar eða að nefndin geti óskað eftir

útprentun eftir hentugleika. Þá væri æskilegt að í samningnum væri ákvæði sem leyfði Breiðafjarðarnefnd að heimila aðilum sem eru að vinna á Breiðafirði og óska eftir því við Breiðafjarðarnefnd, að fá útprentun af tilteknum svæðum. Einnig þyrfti Breiðafjarðarnefnd að hafa heimild til að gera örnefnaskráningarnar aðgengilegar á myndrænu formi á heimasíðu sinni.

Afgreiðsla : Afgreiðslu var frestað en unnið verður áfram í málinu.

Svarbréf Grundarfjarðarbæjar við erindi nefndarinnar til sveitarfélaga vegna skipulagsmála

Rætt var ofangreint svarbréf, dags. 13. febrúar 2004, þar sem þátttöku í verkefninu er hafnað í ljósi þess að sveitarfélagið er sjálft að vinna aðalskipulag fyrir dreifbýlið.

Afgreiðsla : Ákveðið var að ræða málið við bæjartjórn Grundarfjarðarbæjar seinna á fundinum.

Afrit af bréfi Skipulagsstofnunar til Vegagerðarinnar vegna Vestfjarðavegar nr. 60

Ofangreint bréf, dags. 13. febrúar 2004, var lagt fram til kynningar.

Afgreiðsla : Breiðafjarðarnefnd gerði ekki athugasemdir við bréfið.

Afrit af bréfi samgöngunefndar sveitarfélaganna í Barðarstrandarsýslu til Skipulagsstofnunar vegna Vestfjarðavegar nr. 60

Ofangreint bréf, dags. 29. febrúar 2004, var lagt fram til kynningar.

Afgreiðsla : Breiðafjarðarnefnd gerði ekki athugasemdir við bréfið.

Fjármál 2005 og endurútgáfa verndaráætlunar

Erindi Breiðafjarðarnefndar til umhverfisráðherra, dags. 20. febrúar sl., var lagt fram til kynningar. Formaður og varaformaður nefndarinnar fóru á fund Magnúsar Jóhannessonar ráðuneytisstjóra og Hrafnhildar Ástu Þorvaldsdóttur skrifstofustjóra í umhverfisráðuneytinu þann 27. febrúar sl. og afhentu erindið, en þar er óskað eftir fjármagni til reksturs Breiðafjarðarnefndar, til verkefna vegna stefnumörkunar og vegna kortlagningar og upplýsingaöflunar sbr. verndaráætlun, alls. kr. 17.575 þús.

Afgreiðsla : Breiðafjarðarnefnd gerði ekki athugasemdir við bréfið.

Starfsskýrsla Breiðafjarðarnefndar

Lögð var fram starfsskýrsla Breiðafjarðarnefndar fyrir árið 2003.

Afgreiðsla: Skýrslan var samþykkt eftir að gerðar voru á henni lagfæringar.

Kl. 14:30 mættu Eyþór Björnsson settur bæjarstjóri Grundarfjarðarbæjar og Björg Ágústsdóttir bæjarstjóri í barneignaleyfi ásamt Sigríði Finsen forseta bæjarstjórnar og Guðna Hallgrímssyni.

Friðjón bauð gestina velkomna og kynnti nefndarmenn. Hann sagði nauðsynlegt fyrir nefndarmenn og bæjarstjórnir á verndarsvæðinu að hittast og bera saman bækur sínar. Sigríður Finsen sagði frá ýmsum málum sem brenna á Grundfirðingum og tók sérstaklega fram að nýverið hafi fundist heitt vatn í fjörunni við Berserkseyri og óskaði eftir skilningi nefndarinnar ef málefni hitaveitunnar koma upp á borð hennar. Hún sagði frá ferli sem þau hafa staðið í varðandi skipulagsvinnu í Grundarfirði og að nú sé verið að skipuleggja dreifbýlið. Sú vinna sé í góðum gangi og verið sé að vinna við upplýsingasöfnun. Þá velti hún upp þeirri spurningu hvort nauðsynlegt sé að Grundarfjarðarbær tilheyri verndarsvæði

Breiðafjarðar, þar sem aðeins ein eyja tilheyrir bæjarfélaginu og hún sé í einkaeigu og algjörlega friðuð.

Þórólfur sagði frá því að Breiðafjarðarnefnd starfi eftir lögum um vernd Breiðafjarðar og samkvæmt þeim tilheyrir átta sveitarfélög verndarsvæðinu. Hann sagði mikla umræðu hafa átt sér stað um það hvernig framfylgja eigi lögunum og benti á sívaxandi áhuga fólks á Breiðafirði. Þórólfur sagði einnig frá hugmyndum Breiðafjarðarnefndar í skipulagsmálum og benti á skipulag miðhálandisins þar sem ríkið kostaði skipulagsgerð að öllu leyti, en hugmynd nefndarinnar byggist einmitt á svipuðum grunni. Nefndarmenn óskuðu jafnframt eftir því að þegar öll sveitarfélögin hafa svarað erindi nefndarinnar varðandi skipulagsgerð myndi bæjarstjórn Grundarfjarðarbæjar endurskoða afstöðu sína til aðalskipulagsgerðar og veita málinu a.m.k. hlutleysi og var tekið jákvætt í það af hálfu bæjarstjóra.

Mikil umræða átti sér stað um skipulagsmál við Breiðafjörð, en einnig var friðun

Melrakkaeyjar í Grundarfirði rædd og það hver ávinningur friðunarinnar hefur verið.

Friðjón óskaði Grundfirðingum að lokum til hamingju með heita vatnið og sleit fundi kl.

16:00.

Næsti fundur ákveðinn síðar.